

Vumm Mond unn de Stern

Moin ahle Kummbeer Schorsch iss omm Somsdaach bei uns gewese, mir zwaa hawwe uff de Terrass gesotze, enn Gespritzde gedrunke unn e bissi ebbes verzähld. Isch waaß nitt wie merr druffkumme sinn, awwer uff oomol hadde merrs vumm Mond.

De Schorsch hott gefroochd: Honnes, hosde deletzd de Vollmond geseh?

Ja, habb isch ze Antwort gewwe, wie isch die Rollläde vunn de Wohnstubb zugemachd habb isser grad hinner de Beem erauskumme. Warum frächsde, Schorsch?

Doo seeder: No ja, weil mir oigefalle iss, dass isch als Kind immer de Monn im Mond geseh habb, awwer heitzedaach seh isch den nimmi. Doo muss ebbes bassierd soi.

Ja, saach isch, bassierd iss, dass mir Alde unser Fantasie verlorn hawwe. Doo mussde nor widder emol uffere Bonk sitze unn de weiße Wolke noochgugge, doo dusde feststelle, dassde nor Wolke siehst wo de frieher Kieh unn Kälwer geseh host.

Doo hosde recht, seet de Schorsch, dess habb isch aach gedenkd wie unsern kloone Enkel im Gadde im Gras gehoggd unn mir verzähld hott, wasser doo owwe in de Wolke omm Himmel su alles sehe dut.

Isch habb enn Aacheblig noochgedenkd. Irschendwie war frieher die Welt voller Iwwerraschunge. Isch waaß noch, wenn merr als Kinner im Feld warn unn enn Reeschebooch geseh hawwe, sinn merr gerennd weil merr genau wussde, wo der uff de Boddem treffe dut, issen Goldschatz vergrawe. Awwer je näher merr dem Reeschebooch kumme sinn je weider isser fortgezooche unn mir konnte dess Gold nitt finne.

Eischendlich schad, seet doo de Schorsch.

Isch frooch: Was iss schad, dass merr koo Gold gefunne hawwe? Odder dass unser Fantasie flöte gonge iss?

De Schorsch druff: Naa, isch moon noch ebbes onnersders, unn dess iss aach omm Himmel. Weil mir hier in unserne Geeschend nimmi die Milchstrooß sehe kenne. Doo iss Dreck in de Luft, vunn de Fluuchzeuche unn merr waaß vunn was, doo sinn iwverall Lichder unn Lombe. die den Dreck oostrahle, unn donn muss merr spät omm Owend odder midde in de Nacht gons schee Gligg hawwe, grad noch e paar Stern ze seh.

Isch habb geniggd. Ja Schorsch, unn doo isses koo Wunner, wens in Gersfeld in de Rhön unn onn onnern Stelle in unserm Lond ebbes gewwe dut, was Sternepark heeßt. Doo wern die Lichder ausgemacht odder erunner gedrehd unn wennde nor e bissi außerhalb vunn de Stadt bist konnsde die Milchstrooß seh, su wie mir die als junge Leit aach iwver Flerschem geseh hawwe. Ja, aach dess iss schad, dass mir hier ferr su ebbes Scheenes wie de Sternehimmel se seh e Reis mache misse.

De Schorsch hott misch oogeguggd. Wolle merr mol hiefahrn? Dess wern su hunderd-fuffsich Kilomedder soi. Mir missde uns nor e paar Daach aussuche wo koo Wolke omm Himmel sinn unn koon Vollmond iss.

Oh ja, saach isch, Schorsch, dess mache merr. Konnsd du su weit meddem Auto fahrn?

De Schorsch hott de Kobb geschiddeld. Eischendlich nitt, unn du?

Aach isch habb de Kobb geschiddeld. Eischendlich nitt.

Waaßde was, seet de Schorsch, mir setze uns vor doin Läpptopp unn gugge uns die Milchstrooß oo.

Isch habbem uff die Schulter geklobbd. Schorsch, dess mache merr. Unn donn isses egal, obs Daach iss odder Nacht odder obs wolkisch iss odder nitt.

Eiern Honnes